

## París : ua manifestacion de liceans per las lengas autoctònas



París : ua manifestacion de liceans per las lengas autoctònas

Cinc liceans seràn entenuts doman a mièjorn a l'Assemblada Nacionala francesa dins lo grop "Lengas e culturas regionalas". A la medisha ora, i aurà ua amassada sus la plaça parisenca d'Édouard Herriot, davant la bastissa parlamentària, que s'i mobilizaràn especialament de joens d'Occitània, de Corsega, d'Alsàcia, de Bretanha e deu Bascoat. L'amassada segueish la crida deu collectiu Per que Viscan Nòstras Lengas (PQVNL) qu'es plan chepicós deus mejans insufisents afectats a l'ensenhament en aqueras lengas e d'aqueras lengas, a maugrat l'adopcion en abriu de 2021 de la lei de proteccion e promocion de las lengas minorizadas, coneguda coma **Lei Molac**.

Los manifestants volón reclamar ua evolucion de l'article 2 de la Constitution francesa, que consagra a l'ora d'ara lo francés coma sola lenga de la Republica, per obténguer un estatut oficial per las autas lengas autoctònas. Dins aqueth sens, PQVNL se muisha preocupat peus **dus articles de la lei que los censurèt lo Conselh Constitucional**. Concretament, los magistrats considerèn anticonstitucional l'article 4, qu'oficializa la possibilitat d'ensenhament immersiu de las lengas territorialas, e l'article 9, qu'autorizava que de prenomes ajan de signes grafics qu'existeishan pas en francés, coma la "ñ" deu breton e los accents pròpris de l'occitan.

Lo collectiu remembra que l'article 2 de la Constitution estèc adoptat per lutar contra l'anglicizacion creishenta (Lei Toubon) mes qu'a l'ora d'ara serveish pas que per reprimir l'usatge de las lengas ditas regionalas.

<https://www.pourqueviventnoslangues.org/langues-regionales-manifestation-de-lyceens-paris-7-fevrier-a-12h/>

Mercés au Jornalet

**JORNALET**  QUOTIDIAN  
OCCITAN  
D'INFORMACIONS

<https://www.jornalet.com/nova/21827/paris-manifestacion-de-liceans-per-las-lengas-autoctonas-davant-lassemblada-nacionala>